



## PORTAVÓS VI GOVERN U KONSTITUSIONÁL



## KOMUNIKADU BA MEDIA

Díli, Loron 13 fulan-juñu tinan 2016

### Primeiru-Ministru avansa ho Ajenda Governu nian iha Bruxelas no Estados Unidos

Xefe Governu sei partisipa iha sorumutuk balun ho desizor polítiku no personalidade influente (ema ne'ebé iha kbiit atu bele fó nia hanoin ruma) sira iha Bruxelas, Washington no Novaiorke, nia objetivu maka hodi hadi'a kooperasaun internasionál no hodi apresenta pozisaun Governu nian kona-ba problema interese nasional nian sira.

Primeiru-Ministru sei husik hela Díli hodi bá Bruxelas iha tersa, loron 14 fulan-juñu, hodi partisipa iha forum europeu ba problema dezvoltimentu no kooperasaun internasionál, no Jornadas Europeias ba Dezvoltimentu nian. Sei hasoru-malu ho Prezidente República Sentru-Afrikana, Primeiru-Ministru República Federál Demokrátika Etíopia no Ministru Dezvoltimentu Internasionál Suésia, hodi debate forma asisténsia ne'ebé efisiente. Nune'e mós sei halo diskursu ida, ne'ebé foka liubá iha área dezvoltimentu Timor-Leste nian, no hodi esplika progresu ne'ebé maka hetan ona iha aplikasaun ba Objetivu Dezvoltimentu Sustentavel sira Nasoins Unidas nian.

Iha marjen forum nian, sei hala'o sorumutuk bilateral ho lider nasional sira.

Primeiru-Ministru mós sei vizita Estados Unidos América, liuliu iha Washington DC no Novaiorke, ne'ebé sei hasoru-malu ho kuadru sira Administrasaun Obama no dirigente polítiku sira, nune'e mós ho grupu reflesaun nian sira (*"think tanks"*) no forum sira seluk, hodi promove interese Timor-Leste nian sira, inklui esforsu nasaun nian hodi estabesele nia-fronteira marítima sira.

Portavós, Ministru Estadu Agio Pereira, hateten katak " Governu promete fó apoiu hodi hadi'a kooperasaun internasionál ba dezvoltimentu no kontinua sai hanesan defensor ba implementasaun Objetivu Dezvoltimentu Sustentavel nian. Aleinde ne'e, presiza konta ho apoiu internasionál no rekoñesimentu ba ita-nia esforsu hodi hetan delimitasaun ita-nia fronteira marítima sira. Tanba motivu tolu ne'e, viajen Primeiru-Ministru nian ne'e importante no akontese iha momentu estratéjiku ba interese nasional sira".

Primeiru-Ministru fila-hikas mai Díli iha loron 2 fulan-juñu. **REMATA**



Agio Pereira

+670 7723 0011

[agio.pereira@cdm.gov.tl](mailto:agio.pereira@cdm.gov.tl)

[govtlmedia@gmail.com](mailto:govtlmedia@gmail.com)

[www.timor-leste.gov.tl](http://www.timor-leste.gov.tl)